



N°5552
Reçue le 24.01.2022
Déclarée recevable
Président de la Chambre des Députés
(s.) Fernand Etgen
Luxembourg, 24.01.2022

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 24/01/2022

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Interieur, Ëmwelt, Klima an nohaltëg Entwécklung & Landwirtschaft weiderzeleeden.

D'Umweltbundesamt an Däitschland recommandéiert, bei Schnéifall d'Stroossen net mat Salz ze streeën, mee op Sand oder Split ze setzen. Dëst well:

"Der Einsatz von Streusalz ist für Bäume und andere Pflanzen, Tiere, Gewässer, Fahrzeuge und Bauwerke(insbesondere Beton) sehr schädlich. Die Beseitigung oder Eindämmung der Schäden verursachen jährlich hohe Kosten."

Dësweidere kéint d'Salz laut Umweltbundesamt och zu Entzündungen un de Patte vun Déiere féieren. Och d'Associatioun Natur&Ëmwelt huet 2021 nach een Appell an dësem Sënn gemaach, fir d'Quantitéiten u Streusalz drastesch ze reduzéieren.

An deem Zesammenhang wéilt ech de Ministeren dës Froe stellen:

1. Wéi vill Tonnen Streusalz goufen an deene leschten 3 Wantere genotzt?
2. Wéi vill Tonnen aner Streemëttel wéi Sand, Kisel oder Granulat goufen an deene leschten 3 Wantere genotzt, fir eis Stroossen ze sécheren?
3. Wat fir Schrëtt gi geholl, fir beschtméiglech ze verhënneren, dass d'Salz mam Schmelzwaasser an eis Flëss a Baache leeft?
4. An de Froen n°3569 vun 2021 an n°1000 vun 2015 gëtt erkläert, dass keng schlecht Waasserqualitéit an eise Flëss duerch den Asaz vu Salz ka festgestallt ginn. Entsprécht dës Ausso vun der Ministesch nach ëmmer der Realitéit vun haut?
5. Wat fir Schrëtt gi geholl, fir Planzen a Beem nieft de Stroossen beschtméiglech virum Salz ze schützen?
6. Duerch d'Reduktioun vun hirem Liewensraum kommen och ëmmer méi wëll Déieren a Kontakt mam Streusalz op eise Stroossen. Wat fir eng Konsequenzen huet d'Streusalz op dës Déieren?



www.piraten.lu

7. Wien ass responsabel am Fall wou een Déier duerch Streesalz verletzt gëtt a behandelt muss ginn?
8. Wéi ass d'Streeë vu Salz durch Privatpersounen op ëffentleche Stroossen an Trottoirë gereegelt? Wat fir eng Reegele mussen d'Leit hei respektéieren? A wien kontrolléiert dës Reegelen?
9. Ass geplangt an Zukunft nach méi op Alternative zum Streesalz ze setzen? Wa jo, kënnen d'Ministeschten hei konkret Pläng nennen? Wa nee, firwat net?

Mat déiwem Respekt,



GOERGEN Marc

Député





Gemeinsam Äntwert vun der Ministesch fir Ëmwelt, Klima an nohalteg Entwécklung, Carole Dieschbourg, vun der Inneministesch, Taina Bofferding, vum Minister fir Landwirtschaft, Wäibau a ländlech Entwécklung, Claude Haagen, a vum Minister fir Mobilitéit an ëffentlech Aarbechten, François Bausch, op d'parlamentaresch Fro n°5552 vum 24. Januar 2022 vum honorabelen Deputéierte Marc Goergen

Wéi vill Tonnen Streesalz goufen an deene leschten 3 Wantere genotzt ? Wéi vill Tonnen aner Streemëttel wéi Sand, Kisel oder Granulat goufen an deene leschten 3 Wantere genotzt, fir eis Stroossen ze sécheren ?

Am Zäitraum vun deenen 3 leschte Jore goufen op den 2'914 Kilometer Staatsstroossen 63'560 Tonne Streesalz gestreet, woubäi et sech ëm industriellen Natriumchlorid (NaCl) handelt (cf. PISA Wëssensmagazin vum 30. Januar 2022 <https://www.rtl.lu/tele/pisa-de-wessensmagazin/a/1854500.html>). D'Streesalz ass a bleift dat effizientst Mëttel, fir de Stroosseréseau fir d'Zirkulatioun vu Gefierer fräizehalen. All déi aner Alternative sinn net fir den dagdeegleche Gebrauch an eise Breedegraden an eisen Trafic adaptéiert.

Wat fir Schrëtt gi geholl, fir beschtméiglech ze verhënneren, dass d'Salz mam Schmelzwaasser an eis Flëss a Baache leeft ?

Fir d'Quantitéit erfzesetzen, sinn d'Streekurven un déi aktuellsten Normen ugepasst ginn. Vun Nuecht zu Nuecht gëtt, ofhängeg vun de Wiederkonditiounen, de Grammage festgeluegt, an et gëtt am Normalfall "Feuchtsalz" benotzt, dat op der Strooss haft. Op den Autobunne gëtt d'"Nassstreuung" am Preventivasaz agesat (cf. <https://www.rtl.lu/tele/de-magazin/v/3188397.html>).

An de Froen n°3569 vun 2021 an n°1000 vun 2015 gëtt erkläert, dass keng schlecht Waasserqualitéit an eise Flëss duerch den Asaz vu Salz ka festgestallt ginn. Entsprécht dës Ausso vun der Ministesch nach ëmmer der Realitéit vun haut ?

D'Ausso aus de genannte parlamentaresche Froen, dass keen Uewerflächewaasserkierper duerch Salziwwerschreidungen an engem schlechten ökologeschen Zoustand ass, stëmmt nach ëmmer. Genee sou, dass lokal Effekter (och um Niveau vu Kläranlagen) awer net auszeschléisse sinn an deemno eng raisonnabel Uwendung vu Streesalz ubruecht ass.

Wat fir Schrëtt gi geholl, fir Planzen a Beem nieft de Stroossen beschtméiglech virum Salz ze schützen ?

Fir Planzen a Beem nieft de Stroosse beschtméiglech virum Salz ze schützen, gëtt d'Streebreet souwäit wéi nëmme méiglech op d'Breet vun der Strooss reduzéiert, soudass den Impakt op d'Flora sou geréng wéi méiglech ausfällt.

Duerch d'Reduktioun vun hirem Liewensraum kommen och ëmmer méi wëll Déieren a Kontakt mam Streusalz op eise Stroossen. Wat fir eng Konsequenzen huet d'Streusalz op dës Déieren ?

Wien ass responsabel am Fall wou een Déiere duerch Streusalz verletzt gëtt a behandelt muss ginn ?

Wéi schonn an der viregter Äntwert ugedeit, gëtt d'Streebreet beschtméiglech op d'Breet vun der Strooss reduzéiert, wouduerch de Liewensraum vun den Déiere gréisstméiglech geschützt gëtt. Doriwwer eraus ass kee Fall vun engem verwonnten Déier duerch Streusalz op der Strooss bekannt.

Wéi ass d'Streeë vu Salz durch Privatpersounen op ëffentleche Stroossen an Trottoirë gereegelt ? Wat fir eng Reegele mussen d'Leit hei respektéieren ? A wien kontrolléiert dës Reegelen ?

Dës Regele stinn am Code civil, souwéi an de Gemengereglementer.

Ass geplangt an Zukunft nach méi op Alternative zum Streusalz ze setzen ? Wa jo kënnen d'Ministeschten hei konkret Pläng nennen ? Wa nee, firwat net ?

Wéi aus der Äntwert op déi éischt Fro ervirgeet, ass momentan d'Streusalz nach ëmmer dat gëeegentst Entdeemëttel op de Staatsstroossen. Dofir ginn et hei och keng konkret Pläng, fir op aner Alternativen ze setzen.

Lëtzebuerg, den 8. Mäerz 2022.

De Minister fir Mobilitéit an ëffentlech Aarbechten

(s.) François Bausch